

NOS HENDENAN SPECIAL

Pa Mercedes Abdul

Ika Werleman: DESPUES DI 5 AÑA Y MEY TA DESPEDI COMO DIRECTOR DI KINDERHUIS IMELDAHOF

DIARIO tin como invitado awe Ika Werleman, pa nos espacio "Nos Hendenan Special". Tur hende conoce Ika como director di Kinderhuis Imeldahof di cual e ta despedi Diabierna 25 awor despues di 5 aña y mey di a realiza un bunita labor den dicho instituto. Tocante su experiencia como directora y su plannan futuro, Ika ta elabora durante e conversacion aki.

ESTUDIO

Ika a pasa su school basico na Maria School na Santa Cruz, despues el a bay Colegio Arubano unda el a haci VWO-A, despues el a bay Hulanda unda a cuminsa studia Pedagogia na Universidad di Groningen cual e no a finaliza, y despues a bay Sociale Academie na Leeuwardem unda el a studia Opbouwwerk. Actualmente Ika ta studian-do ley pa dos aña na Aruba.

TRABAO

Ika a bolbe Aruba na aña 1986, y a cuminsa traha cu Osticeba den un proyecto pa mayornan hoben. Despues el a traha pa un aña como Opboumedewerker na Centro Kibrahacha. Siguietemente Ika a traha pa un aña y mey cu FAVI como trahador social, y na aña 1990 el a bay traha como director di Kinderhuis Imeldahof. Ika ta splica kico su estudio ta encera y con su experiencia tabata na Imeldahof di unda e ta despedi Diabierna 25 di Augustus. "Opbouwwerk ta trabao social- cu gruponan. Kiermeen bo ta siña pa bo ta un profesional cu por

yuda gruponan cu tin un problema y cu kier traha na e solucion di nan problema. Esaki ta encera cu bo ta worde forma pa un tipo di manager.

Esey kiermeen cu e trabao cu mi a haci na Imeldahof tabata esun di maneha e instituto diariamente, unda mi tabata dirigi un personal di 28 persona. Por lo demas e trabao ta encera cu mi mester a zorg pa e instituto por a draai diariamente. Es decir mi mester a percura pa tur e condicionnan necesario pa e trabao por a sigui, manera pa tin suficiente personal, suficiente medionan financiero, pa e edificio y materialnan di trabao ta na ordo, e relacionnan publico y e preparacion di e maneho pa e directiva".

IMELDAHOF

Durante 5 aña y mey na Imeldahof Ika a pasa den un experiencia hopi interesante y agradable tambe.

"E trabao ta un trabao hopi duro, y importante cu ta existi masha hopi mes di tur esnan cu ta traha eyan.

Mi por bisa cu tur esnan cu ta traha eyan tambe ta hendenan cu ta traha masha duro mes.

E instituto ta worde subsidia door di gobierno y nos ta haya hopi donacion for di den comunidad, loke nos tin mester di dje pasobra e gastonan ta hopi.

Pa loke ta trata e condicionnan di trabao, manera material pa nos por traha cune, nos ta den un posicion basta favorable.

Pa loke ta traha suficiente personal esey si mi tin cu bisa cu semper den e tipo di trabao aki bo ta traha cu masha tiki personal pa carga tur e responsabilidad cu bo

tin.

Por ehemplo nos no tin un trahador social den servicio, nos no tin un propio especialista riba tereno di educacion (un psicologo of orthopedagogo), nos no tin un lider di actividadnan y nos ta haci falta tambe lidernan di grupo.

Eynan actualmente tin un problema pa motivo cu no tin hende na Aruba disponible cu tin e educacion cu nos tin mester, esta di Internaat werksters. Esaki ta e motivo tambe pakico te ainda nos no ta brinda e servicio na e muchanan tambe durante fin di siman cual ta un di e problemanan di mas grandi cu nos tin.

Tocante e muchanan mi por bisa cu e problematica a bira mas pa aña mas complicada.

Aworaki nos ta haya hopi mucha cu a worde abusa sexualmente, muchanan cual mayornan ta malusa alcohol y/of droga, y muchanan cu comportacion problematico.

Loke ta resalta awendia ta cu hopi mucha tin cu lanta sin suficiente guia y supervision di adultonan. Door di esey bo ta haya cu muchanan ta worde negligia den nan desaroyo, cual ta conduci na e problemanan di comportacion.

NECESIDAD DI GUIA AMBULATORIO

Ika ta menciona cu na Aruba ta haci hopi falta di hendenan capacita pa duna guia-ambulatorio na fami-anan.

"Esaki tin como consecuencia cu mayornan ora cu nan tin problemanan cu nan yu-nan no por acudi un caminda pa haya ayudo door di cual e problema ta keda



empeora, te cu a lo largo un mucha mester worde interna pa haya e ayudo necesario, y esey ta un lastima pasobra si tabata tin ayudo ambulatorio kizas por a worde evita cu muchanan mester worde interna. Un internaat kizas no ta e lugar mas adecua pa un mucha lanta, y e tipo di ayudo aki ta un tipo di ayudo hopi mas caro cu e ayudo ambulatorio cu nan por a haya".

Un di e preocupacionnan cu Ika tin ta cu na Aruba tin masha poco centronan di cuido pa muchanan despues di school, mas teniendo cuenta cu den mayoria hogar, ambos mayor ta traha.

"Aunque cu nos por nota un desaroyo positivo aki na Aruba unda cu tin diferente instancia ta trahando riba e tereno di educacion pa mayornan, esaki no ta suficiente. E tarea di un mayor ta un tarea hopi importante pero pa cual nan no ta haya ningun preparacion di antemano. Esaki tambe ta un tarea di nos comunidad pa ofrece na mayornan mas curso, informacion, sosten, con pa den e temponan dificil aki duna nan yunan mehor educacion".

FUTURO

Ika ta despedi di Imeldahof pa motivo cu el a planea di antemano cu lo traha pa mas of menos 5 aña como direc-

tor pa despues duna e encargo aki na un otro persona.

"Mi ta kere cu ta bon pa e instituto cu ta bini un hende nobo pa dirigie despues di cierto periodo. Mi ta kere cu un hende mester keda crece y haci esfuerzo pa bay dilanti, y pa e motivo aki mi a cuminsa studia ley dos aña pasa, y awor mi kier bay traha riba e tereno hudicial".

GRATITUD

"Durante e 5 añanan y mey cu mi a traha na Imeldahof nos a haya cooperacion di masha hopi hende mes. Cooperacion di instancianan di gobierno, di casnan comercial, di prensa, y di esonnan individual, y tur esonnan mi kier agradeci y alavez haci un apelacion riba nan pa keda coopera na mesun bon manera cu kinderhuis Imeldahof pasobra al fin bo ta sostene asina e muchanan di Aruba.

Mi ta desea e trahadornan hopi exito cu e trabao y mi ta convenci cu mi ta laga e muchanan den bon man, pasobra cu mi sa cu e hendenan conoce nan trabao y cu nan lo sigui hacie cu e mesun amor y motivacion. Na tur e muchanan mi kier bisa cu unda cu mi bay mi lo keda corda riba boso. Yuffrouw Ika ta stima boso tur".